

李文忠公奏稿

李文忠公奏稿

卷之七目錄

擬抽隊會剿金陵摺

同治三年六月十七日

金陵克復改派各軍截剿收匪摺

同治三年六月十九日

湖州攻克晟舍賊壘摺

同治三年七月十六日

進規廣德片

同治三年七月十六日

克復湖州摺

同治三年七月二十九日

京營弁兵到蘇學製外洋火器摺

同治三年七月二十九日

攻克湖州詳細情形並克復四安廣德摺

同治三年八月初五日

銘軍擊賊甯國孝豐安吉界內摺

同治三年八月二十三日

陳明蘇省兵餉片

同治三年八月二十三日

欠解三成船鈔請歸本省軍需造銷片

同治三年八月二十三日

克復蘇省並浙江各城案保獎摺

同治三年九月初三日

馬格里請賞三品頂戴片

同治三年九月初三日

奏保陳鼎片

同治三年九月初三日

北洋豆貨上海一口請歸華商轉運摺

同治三年九月初十日

收回北洋豆利保衛沙船片

同治三年九月初十日

援案請發餉票找抵欠餉片

同治三年九月初十日

撥借甘餉三萬兩摺

同治三年十月初七日

監臨鄉試片

同治三年十月初七日

蘇太分建考棚片

同治三年十月初七日

豁免江南七縣錢漕摺

同治三年十月二十五日

請裁富明阿一軍分協甘皖軍餉片

同治三年十月二十五日

惠山建立昭忠祠片

同治三年十月二十五日

蘇軍征調分防情形摺

同治三年十一月初五日

停止攤捐船工片

同治三年十一月初五日

豁免攤款摺

同治三年十一月初五日

赫德請加按察司銜片

同治三年十一月初五日

免追徐佩瑗前領餉銀片

同治三年十一月初五日

本科鄉試通融辦理摺

同治三年十一月二十九日

劉銘傳等軍暫難赴豫遠征摺

同治三年十二月十九日

軍需核實報銷摺

同治三年十二月二十七日

京營官弁習製西洋火器漸有成效摺

同治三年十二月二十七日

李文忠公奏稿卷七

全集一之七

桐城吳汝綸編錄

擬抽隊會剿金陵摺

同治三年六月十七日

奏爲馳赴長興察酌大勢擬先抽派鎗礮隊一萬四千人會剿金陵仍撥兵分守太湖東西兩岸俟浙軍進剿湖州相機夾攻恭摺仰祈

聖鑒事竊臣疊奉

諭旨撥兵會剿金陵當經兩次附片馳陳並聲明長興克復親赴前敵察看軍情賊勢相機調撥臣於六月初一日由蘇啟行途次接奉五月二十九日

寄諭著於所部各營內挑選精壯便捷善於攻城者二三千人卽交劉銘傳等帶赴金陵長興卽克復該撫統率諸軍助攻金陵

不必定俟湖州克復等因欽此又奉六月初四日

寄諭著李鴻章仍遵前旨俟長興克後赴援金陵並令劉銘傳等

督帶選鋒先行馳往助剿等因欽此仰見

宵旰憂勤先其所急之至意臣由太湖沿路察看徑抵長興查知前次攻克該城斃賊甚眾逆首劉官方是否死於亂軍之中未得確據援逆敗退四安湖州等處雖尙負固而賊氣漸衰長興距湖州六十里形勢最爲扼要賊與我所必爭既經攻克若不分兵他往自應乘勝進攻惟念屢奉

廷旨諄諄以會剿金陵爲急督臣何國藩疊次奏者並聞鄂賊已竄過麻城黃岡有直趨皖境之勢誠恐金陵飢困之賊偵知援逆漸近死灰復燃於大局殊有關礙臣由長興回蘇後卽檄調南贛鎮總兵王永勝所部十營古州鎮總兵劉士奇所部八營由長興

拔隊並程學啟所遺開花礮隊交王承勝等督帶前往又調現駐  
句容之遇缺提奏提督劉銘傳各營五成鎗隊並所部畢乃爾開  
花礮隊又調現紮溧陽南渡之提督周盛波挑選精銳鎗隊一千  
人併歸劉銘傳一起剋日會合赴援金陵因天氣酷熱軍士遠役  
易致疾病屬令曉夜登程分起徐行其輜重糧藥礮位子彈均由  
水路裝運長江千里船隻維艱須月杪方能齊備該軍等行抵金  
陵應由何路進隊何門紮營何處安礮已諄諭各將細心妥籌稟  
請曾國荃指示調度並派劉銘傳先赴金陵周察地勢熟商辦理  
現在湖州未復蘇防未鬆臣暫難遠離俟各軍拔營後如此閒防  
剿大局布置定妥臣擬乘坐輪船攜帶常勝軍所遺礮隊前往協  
攻仍剋期往還以圖兼顧至湖州賊股尙眾附城三十里面面堅  
壁昨准左宗棠來緘不欲急攻吳興先規安吉孝豐以斷竄路現

李豐已復浙軍正副安吉一時似難直趨湖州而蘇境與湖州接  
壤中隔太湖有李朝斌水師足以禦之其太湖西岸由長興而達  
宜興溧陽是長興須留重兵臣揀派郭松林楊鼎勳十五營分屯  
長興城內外並調現守溧陽之道員吳毓芬水陸五營移駐長興  
之夾浦口而調總兵周盛傳三營接守溧陽其太湖東岸由吳淞  
南潯而達平望潘鼎新一軍分扼數處尙嫌單薄擬調現駐松江  
之劉秉璋七營進紮平望與潘鼎新合力堵剿如浙軍由湖州東  
南進偪則湖西郭松林各軍與湖東潘鼎新各軍即可聯絡並進  
會同李朝斌由大錢小梅各口進蹙湖郡西北以剿爲堵聊分賊  
勢而助長圍總之金陵湖州兩處攻剿均尙費手臣之兵力原不  
足以兼營惟金陵關繫數省全局如能協力攻克則湖州自亦解  
體區區愚慮欲遵



行協攻金陵仍兼防湖賊內竄相機而動所有酌量分撥各緣由  
繕摺馳陳伏乞

皇太后

皇上聖鑒訓示謹  
奏

金陵克復改派各軍截剿敗匪摺

同治三年六月十九日

奏爲金陵克復改派各軍截剿敗匪並擬乘機分路會攻湖州恭摺仰祈

聖鑒事竊前派劉銘傳劉士奇王永勝各軍協剿金陵正在料理啟程適准曾國荃飛咨江甯省城於十六日午刻用地道克復仰

惟  
皇太后暨我

皇上宵旰憂勤刻刻以金陵老巢未拔爲慮茲曾國荃冒暑督戰有志竟成從此東南大局立見轉移各省鼠賊聞而解體無難以次削平皆緣

聖德感孚天人應助仰承

先皇未竟之志稽顙

列聖在天之靈率土臣民同深欣慶況臣忝司疆土獲見肅清其  
驩忭感賀下忱尤無既極除克復詳細情形由督臣曾國藩等具  
奏外惟金陵賊首是否就擒全股能否殲滅曾國荃來咨未及詳  
敘各處探報亦未確知誠恐敗匪乘間衝竄臣飛飭現守句容之  
劉銘傳現守東壩之黃中元鄭國魁現守溧陽南渡之周盛波等  
分兵嚴守城隘一面探明賊蹤合力兜剿務使悉數殲擒毋或漏  
網臣初檄調王永勝劉士奇兩軍由長興拔赴金陵但留郭松林  
楊鼎勳分守該城兵力稍單難遽深入茲飭王永勝等折回長興  
併由太湖西岸進紮劉秉璋潘鼎新兩軍併由太湖東岸進紮仍  
會同李朝斌太湖水師與浙軍會剿湖州左宗棠所部現分攻安  
吉如卽得手則浙偏浙緊可與蘇軍通氣臣惟督飭郭松林等聯  
絡齊進以圖合力攻克仰慰

聖慮所有金陵克復改派各軍分投堵剿緣由繕摺馳陳伏乞

皇太后

皇上聖鑒訓示謹

奏

湖州攻克辰舍賊壘摺

同治三年七月十六日

奏爲湖州東路水陸官軍疊次苦戰攻克辰舍等處賊壘大獲勝仗恭摺仰祈

聖鑒事竊

臣

前派王永勝郭松林等軍由太湖西岸進紮潘鼎新

劉秉璋等軍由太湖東岸進紮會同李朝斌太湖水師與浙軍會

剿湖州於六月十九日陳明在案嗣准左宗棠來函知浙軍蔡元

吉進紮湖郡東南之長超山被賊圍攻甚急並由蔣益澧屢次函

商潘鼎新促攻辰舍賊營以分賊勢潘鼎新以浙軍待援孔迫且

辰舍悍賊麇集北自織里至湖濱西自錦山至湖郡一片蔓延卽

我南潯各營兼恐受敵遂於六月二十二日調派駐平望之方有

才焦宗良二營移紮舊館頭敵並調唐宏成戴春林趙濟川潘鼎

立韓照揚丁壽昌劉思河吳秉權等各抽行隊繼之辰舍之賊憑

河自固港汊紛歧於街口排立石礮四座外加木城內挖地窖以  
避開花礮彈我軍倉築三營於對河安放炸礮二十四日黎明趙  
濟川督放礮位唐宏成戴春林焦宗良由北岸統礮戢舍北街石  
營潘鼎立韓照揚方有才由中路攻其臨河石礮丁壽昌等在中  
路策應水師徐道奎曾泗美亦以礮船對礮自卯至午賊營屋盡  
轟倒死踞如故西而援賊忽至丁壽昌唐宏成併力夾擊乘勝撲  
營賊倚兩河爲濠我軍晷過第一河賊以排鎗死抵丁壽昌方有  
才揮勇過第二河賊於河內木椿上釘鐵籤我軍更番猛撲不  
得上傷亡甚多日正午酷熱軍士發暈遂行收隊潘鼎新復從吳  
淞添調夏金標一營二十四日李朝斌亦從太湖駛至與潘鼎新  
周察形勢議須逼近紮營便於轟礮二十五日潘鼎新令夏金標  
在對面頭濠外乘夜倉築營壘二十六日令方有才趙濟川乘夜

兩面築營爲犄角賊屢於半夜斃水偷營輒擊走之唐宏成韓照揚焦宗良紮舊館西頭兩岸爲中路接應潘國揚潘鼎立紮舊館之東爲後路接應其南潯之丁壽昌三營仍以行隊爲游擊之師曾泗美徐道奎師船依護前敵李朝斌復添調太湖水師四營登岸出隊二十七日各軍會合前敵分路齊進賊匿壘穴中狙擊迄不少動我軍海生輪船炸礮與水師連環轟打賊營已塌數丈太湖水師營官江福山帶隊登岸大呼躍濠各軍繼之將近壘邊適錦山織里援賊兩面大至壘賊連放排鎗弁勇傷亡不少江福山摧鋒直前鎗子洞胸穿背立時陣亡援賊乘勢撲犯我軍水陸夾擊斃賊極眾賊始敗回仍因酷熱收隊賊遂於營外添築長牆一道層開礮眼日夜擊我前敵三營七月初一日李朝斌自帶水師三營與唐宏成攻戍舍北街潘鼎新令潘國揚潘鼎立各營攻戍

舍中街及塘沿賊壘水師護之自辰至午炸礮轟塌賊牆其內濠  
石橋礮臺一座亦已轟倒各軍乘勢過河拔柁進撲第二濠詎賊  
於礮臺塌處填塞柴薪灌以藥桶火發被阻踰濠之勇并力撲營  
三四次賊排鎗如雨水陸營官潘鼎立田名魁張陞楷等均受鎗  
傷竹弁勇丁傷亡二百餘名賊壘外牆雖倒內營屹立探知新添  
悍賊三四千人拚命死守我軍勢難銳進仍復止攻潘鼎新因思  
賊營隔河兩道非繞出北路數里廣搭浮橋不能越衝北街賊壘  
非轟破沿塘礮臺盡絞木椿不能越衝南路賊壘中路當賊正面  
非得制禦排鎗之法不能肉薄中街各賊壘連日購備稻草木料  
竹牌溼絮賊仍以大礮對轟我軍不動十一月初更後潘鼎新令  
潘國揚潘鼎立何孝繼分繞北路搭橋一面乘夜輪攻牽掣賊勢  
水師田名魁徐道奎督礮船相輔疊進四鼓收隊以唐宏成焦宗



良繼之十二日午前收隊以夏金標方有才繼之戴春林督隊憑牆施放炸礮各軍環攻該逆死拒不退北路織里後林援賊疊撲均被擊退遂搶成浮橋數道阻於利濟寺大卡未進中路炸礮轟倒北街中街賊營各礮臺牆洞穿阻於沿塘礮臺未進我軍以鎗礮守住缺口夜不收隊賊亦拚命搶護十三日五鼓潘鼎新自帶潘國場潘鼎立何孝繼唐宏成從北面直走織里來路埋伏桑林填小河三道包抄利濟寺卡後丁壽昌劉思河吳秉權從中路進夏金標方有才焦宗良從南路進以李朝斌所派曾泗美田名魁協同徐道奎水師由塘河盤起木椿派海生輪船轟擊臨河橋邊礮臺先是浙軍張景棠紮營偏西並令出隊協剿自辰至午賊營盡塌猶恃木城死拒當揮令各軍猛撲北路潘國場潘鼎立唐宏成先奪利濟寺卡填河繼撲總管堂賊營潘鼎立裹創鏖戰立

破之賊沿港亂竄直追至北街賊後丁壽昌丁德昌劉思河吳秉權率勇由中路填河拔柅賊鎗雨密頭隊傷墜後隊繼之楊春發周式貴首先登壘中街兩壘皆破南路擊毀礮臺夏金標方有才焦宗良與田名魁等水陸並衝將靠塘大石壘攻破北面壘賊突見我軍自後撲至紛紛驚潰唐宏成潘國揚韓照揚等乘勢掩殺北街石壘亦破於是鎮後賊營皆棄壘狂奔曾泗美田名魁等帶隊登岸踏毀西首沿塘各壘水陸合力窮追直至昇山八里店南北官塘之賊截殺過半計共踏毀屍舍總管堂昇山等處石壘八九座殲斃殺斃淹斃無數營官唐宏成肘受鎗傷劉思河腹受鎗傷吳秉權手受鎗傷弁勇共傷亡三百餘名臣查屍舍當湖州東面與進南之長超山進北之織里後林各賊壘黏連一氣實爲湖城屏蔽據左宗棠函稱獲賊訊供知堵輔各逆意在趨重東路內

竊嘉興是以更番調派悍黨守此要隘地勢憑河數道本極險固  
守賊堅忍尤逾尋常自浙軍張景渠等屢攻未下李朝斌潘鼎新  
又兩次環攻未能立破臣深爲焦慮若晟舍不克浙軍圍且益急  
並恐由織里後林一帶繞襲南潯平望後路茲潘鼎新等於炎天  
烈日中督率水陸晝夜猛攻將士傷亡枕藉卒以苦戰拔此堅巢  
從此湖東賊勢漸衰不難次第剿洗俟西面各軍得有進步即可  
漸逼漸緊以期得手此次尤爲出力之按察使銜常鎮通海道潘  
鼎新苦心孤詣攻堅奪隘百折不回可否請

旨賞加布政使銜並

賞給勇號記名總兵唐宏成潘國揚可否

記名遇有提督總兵缺出卽行簡放提督銜記名總兵曾泗美可  
否以總兵遇缺儘先提奏總兵銜儘先副將田名魁副將銜參將

已保總兵韓照揚戴春林儘先副將徐道奎儘先游擊已保副將  
潘鼎立夏金標方有才可否均以總兵

記名簡放戴春林可否並

賞給勇號江蘇卽補道丁壽昌可否

賞加按察使銜並

賞給二品封典儘先游擊已保副將銜參將丁德昌可否以副將  
儘先推補並

賞給勇號儘先千總已保都司銜守備劉思河可否免補都司守  
備以游擊儘先拔補並

賞加副將銜候補知州萬國順同知銜候選通判吳秉權焦宗良  
可否均

賞加知府銜已保游擊銜都司儘先守備楊春發周式貴已保都

司儘先千總陳繼宗可否均

賞加參將銜其陣亡之太湖水師營官記名總兵江福山號勇過人在蘇浙境內戰功甚偉此次冒險奮進捐軀尤烈可否懇

恩敕部照提督陣亡例議卹並於死事地方建立專祠花翎守備已保都司蔣正芳已保都司儘先把總胡廷貴已保花翎守備藍翎把總胡永泰已保藍翎千總六品軍功花永和已保藍翎把總曹得順外委孫得才可否均

敕部照擬保官階陣亡例分別議卹其餘出力及陣亡將士員弁容臣查明彙案分別奏請

獎卹外所有水陸官軍疊次苦戰攻克展舍等處逆孽緣由理合繕摺由驛馳陳伏乞

皇太后

皇上聖訓示謹  
奏

進規廣德片

同治三年七月十六日

再金陵既克湖州踞賊僞堵王黃文金僞輔王楊輔清等匪眾十餘萬仍圖死守一以湖州襟山帶湖西南則營壘層疊東北則于港白汊形勢甚險糧食甚多足以自固一以廣德四安安吉各處分眾踞守犄角勢成該逆可由此上竄徽浙而江西大股亦可由徽浙經廣德而回援湖州蓋湖州其堂奧而廣德四安其門戶也現在安吉一路左宗棠派兵堵剿並復飭郭松林王永勝劉士奇楊鼎勳等由長興呂山進攻尹隆橋大德橋一帶賊壘直搗中堅如能剋期攻拔則由湖州至四安之路已斷惟探聞廣德州城內外有僞王數人帶萬餘賊踞守該處東達湖郡西通東壩北接建平溧陽爲賊匪來往要道實皖浙江蘇三省樞紐之區目下蘇境肅清腹地無事臣擬派現守句容溧水之馮缺提奏提督劉銘傳

統帶所部並現守南渡之堤督周盛波各營由東壩建平前進以  
剿爲堵相機攻取儻得廣德而守之湖賊去路旣梗羽翼漸孤而  
江西皖南回竄之路亦少且與郭松林等西路各軍兩面夾擊較  
爲得勢惟聞由建平至廣德山徑叢歧人煙荒涼河路不通轉運  
極艱是以數年以來曾國藩屢議分兵攻守而力有未逮並屬劉  
銘傳督率各軍酌度機宜仍力顧東壩溧陽各防穩慎籌辦至廣  
德四安去路若斷誠恐湖賊鋌險內竄沿湖東面亦須添兵協剿  
潘鼎新所部由舊館晟舍進紮劉秉璋所部由吳淞軋村進紮勢  
已聯絡惟白湖濱之大錢口迤東而至昆山昇山賊營林立必須  
次第攻打又添湖現守常州之簡用道張樹聲所部六營由平望  
前進會同潘鼎新劉秉璋合力進取仍分顧後路以防竄突並飭  
隨時商會浙軍分道夾剿互爲聲援所有近日調派各路軍情除



奏  
查明兩江督臣曾國藩閩浙督臣左宗棠外理合附片縷陳伏乞  
聖鑒訓示謹

克復湖州

七月二十九日

奏爲劉銘傳各軍進攻廣德郭松林等軍猛攻四安中路潘鼎新劉秉璋各軍分進屢舍大錢口連番攻剿賊勢窮蹙遂於二十七日克復浙江湖州府城恭摺仰祈

聖鑒事竊臣調派諸軍分路進取三面圍逼湖州會合浙軍夾剿於七月十六日縷晰奏報在案自潘鼎新攻克屢舍賊壘沿湖東岸賊營皆潰敗逆日有逃散潘鼎新乘勝進紮屢舍劉秉璋一軍由吳淞楊鴻儒紮湖東要隘之大錢口張樹聲一軍又由南潯進紮織里聲援極壯各營連日出隊迭有斬擒臣聞湖州賊勢趨重四安一路飛催劉銘傳郭松林等分路乘機蹙之劉銘傳於二十日親督馬隊及黃桂蘭兩營先赴建平至廣德一路酌紮布置劉盛藻唐殿魁周盛波各軍陸續繼進日下計抵廣德城根接仗其

攻剿若何情形候馳報到日再詳細奏明至湖州西而尹隆橋大德橋一帶上通四安廣德大道該逆節節聯營以護竄路臣飭郭松林王永勝劉士奇楊鼎勳等長興各軍由呂山進攻尹隆橋扼其中段要害詎該逆先於尹隆橋大河南岸築堅壘十數座又於橋頭築石卡月牆一道上流橫塘渡另築多壘廣搭浮橋與尹隆橋援應犄角王永勝派開字新中營與賊對紮該逆復於月牆左右添築兩營牆外掘濠二道寬約二丈引漕河水深可滅頂排釘木城繞壘五匝又加釘梅花椿數十層極為嚴密郭松林等連夜起築長牆調齊劉玉龍所帶開花礮隊安設礮打十五日晡至未刻賊壘稍有缺處而湖州大股憑河埋伏勢若長蛇守賊於營卡地窖中堅伏不動廖德旺高占彪舒義志李長樂文茂林等奮勇先進拔樁傾濠適因水深不能覺渡乃伏賊齊起鎗礮環施首登

之哨官張祖述死之高占彪舒義志等皆受重傷天晚收隊十六  
日我軍復以炸礮轟擊午後于奇泮顏邦桂張正久王萬釗等衝  
鋒齊進賊鎗礮愈密三面夾擊傷亡弁勇不可勝計是夜郭松林  
派李長樂宋德鴻等楊鼎勳派王萬釗周河清等率隊潛拔濠外  
木椿十七日激勵眾軍鼓勇齊登並飭呂山大德橋橫塘渡各營  
嚴截援賊已刻開花礮轟缺賊卡一處眾勇各負膽柴一束填塞  
賊濠王永勝劉士奇率隊在前郭松林楊鼎勳嚴督於後一呼猛  
進直抵內濠賊眾以鎗礮層層狙擊拚死抵守弁勇傷亡雖多郭  
松林揮令急進又破鎗子中傷左膀正欲迴濠登壘忽大雨如注  
鎗藥皆溼收隊回營湖城賊眾仍逐日添隊前來死護堵逆黃文  
金復挑悍賊數千繞呂山後路八字橋阻我糧道十九日郭松林  
抽派李長樂文茂林顏邦桂三營馳往李家巷搶築營壘又派各

營行隊助紮辰刻李長樂等營壘半就賊眾由洞子門蜂擁來撲我軍迎戰兩時斃賊甚夥參將何錫恩死之各軍憤極齊上賊遂潰退二十日湖賊大隊自尹隆橋接連八字橋洞子門沙水橋白龍洞一帶表延二十餘里傾巢來爭郭松林飛調易用剛朱德鴻周蘭亭等迎敵自料李長樂等斷後劉士奇王永勝各率兩營由呂山夾擊楊鼎勳督守尹隆橋老營已刻山上賊旗搖動羣逆吶喊衝下易用剛等整隊接戰鎗礮對轟易用剛受傷甚重郭松林率李長樂等捲旗突入來往縱橫並傷王平西礮船由河內助轟斃賊無數賊陣漸亂王永勝劉士奇由山谷翻下疾如風雨逆眾倉皇紛竄陣僞列王黃十四乘勢掩殺擒斬數千名王永勝追過洞子門片殷山山後小路出援郭松林分隊擊走之其傷亡弁勇百餘名聞賊眾皆趨西路有欲竄之勢飛飭潘鼎新劉秉璋

等相機進攻二十六夜昇山守逆棄壘先走潘鼎新會合浙軍劉樹元等帶隊追剿二十七日清晨追至八里店該逆回拒水陸各軍併力夾擊大破之追至三里橋該處壘逆望風狂奔李朝斌劉秉璋張樹聲等各進大錢口攻毀賊營十餘座併至城下沿途殺斃淹斃賊匪無算敗賊擁擠入城閉門不及潘鼎新等率隊奮勇先登由東門而入斬馘甚眾遂於七月二十七日已刻克復浙江湖州府城潘鼎新已會同浙軍入城布守臣得信後飛飭郭松林王永勝等由四安中路截剿劉銘傳周盛波等由廣德前路兜剿計此路賊營最密山徑叢雜雖可開道衝突而我軍分投掩捕合力追擊亦難善脫除浙軍攻剿情形由左宗棠具奏廣德四安戰狀容臣續行詳奏外查此次肅清蘇浙尤爲出力之已保布政使銜常鎮道潘鼎新督隊苦戰克復名城翰林院侍講劉秉璋躬冒

矢石治軍嚴整雲騎尉世職

賞穿黃馬挂江南提督李朝斌謀勇兼優所向無前三品頂戴簡用道張樹聲堅忍百戰積功甚偉以上四員應如何優加獎勵之處臣未敢擅擬伏懇

聖裁至統領兵勇之遇缺提奏提督劉銘傳周盛波福山鎮總兵郭松林南贛鎮總兵王永勝古州鎮總兵劉士奇記名簡放提督楊鼎勳均力扼要衝拚力戰爭應俟廣德四安克復截剿竄賊報到再由臣核明據實保奏其力戰陣亡之擬保副將銜儘先參將何錫恩擬保參將滕國春擬保參將銜儘先游擊張祖述擬保游擊銜儘先都司余兆貴曹廣惠均從征日久每戰當先應於蘇州克復案內彙保尚未出奏請

旨敕部各照擬保官階從優議卹以慰忠魂其餘應獎應卹人員

容再查明策奏所有各軍滾營進偏攻剿獲勝克復浙江湖州府城大概情形專摺馳陳伏乞

皇太后

皇上聖鑒訓示謹

奏



京營弁兵到蘇學製外洋火器摺

同治二年七月二十九日

奏爲奉發京營弁兵到蘇分派各局學習製造外洋火器遵

行酌定薪水等項恭摺覆陳仰祈

聖鑒事竊臣於本年五月間奉

寄諭總理各國事務衙門奏請派京營弁兵學製火器一摺據稱  
練兵之要制器爲先洋人所製炸礮炸彈等項尤爲行軍利器現  
在李鴻章軍營製造此項火器已有成效擬請飭火器營於曾經  
學製軍火弁兵內揀派武弁八名兵丁四十名發往江蘇一體學  
習等語所奏自係爲思慮豫防起見本口業經諭令火器營照該  
衙門所請派撥矣此起弁兵俟抵江蘇後卽交李鴻章差委專令  
學習炸礮炸彈及各種軍火機器如能留心學習著有成效者准  
該撫從優奏請獎勵其有意惰偷安不遵約束者卽照軍法治罪

該撫務當明定勸懲俾該弁兵等盡心講求以期備得西人之妙  
該弁兵等到蘇後該撫務須加意稽察妥爲防閑俾祕妙之傳不  
致稍有漏洩方爲妥善所有應給薪水等項卽由江蘇酌定支發  
准其作正開銷等因欽此並先後接准總理各國事務衙門暨三  
口通商大臣崇厚咨會此項弁兵已由津附搭輪船赴蘇卽經行  
知蘇松太道飭俟該弁兵等到滬時妥爲照料隨據該署道丁日  
昌呈報護軍參領薩勒哈春等官兵四十八員名跟役十二名於  
六月二十日抵滬遵將自津來滬輪船價值在於船鈔項下發給  
並備船送至蘇省臣接見該參領等並將各兵丁逐名點驗逐細  
教導令其悉心講求緣臣軍先後購覓西洋炸礮每月操練攻剿  
需用炸彈甚多不能不添設製造局分濟應用計現開炸彈三局  
一爲西洋機器局派英國人馬格里雇洋匠數名照料鐵鑪機器

又派直隸州知州劉佐珉選募中國各色工匠幫同工作一爲副  
將韓殿甲之局一爲蘇松太道丁曰昌之局皆不雇用洋人但選  
中國工匠仿照外洋做法當即酌令儘先參領薩勒哈春候補副  
參領崇喜並護軍校常英王慶等四員帶京營兵二十名赴洋人  
馬格里等礮局又令儘先副參領色布什新並護軍校達隴阿等  
二員帶京營兵十名赴韓殿甲礮局又令額外空花翎德俊並護  
軍校常慶等二員帶京營兵十名赴丁曰昌所設礮局該三局分  
配學習參互考校責成局員會督弁兵指引各項門徑並隨同匠  
作勞身苦思究其精微並仍隨時查詢試能否以定優劣立賞罰  
以示勸懲該弁兵等如學習有效必當遵

旨從優保獎若怠惰偷安或該管官約束不嚴各局員未經細心  
教導亦必分別懲處俟製造略臻精熟再酌選明白勇敢者派往

破隊營中學習演放步伍準頭逐漸推求以期稍得西法之妙至該弁兵等應給薪水等項奉

旨由蘇省酌定支發作正開銷臣查此項薪糧無案可循飭由報銷局查照軍需則例開呈京營弁兵調往軍營應支鹽折等項分別擬具支數請示前來惟蘇省兵燹之餘食用較貴各局工匠因係製造祕器多方羈縻其口糧較常例均加數倍況該弁兵由京遠道來南學製火器要件責令格外用心薪糧應較軍營加厚以示鼓勵當即酌定職分較大之參領薩勒哈春副參領崇喜色布什新空花翎德俊等四員每月支給薪水庫平銀三十六兩其幫帶之護軍校常英王慶達隴阿常慶等四員每月支給庫平銀二十四兩兵丁四十名每月支給庫平銀八兩跟役十二名每名月支給庫平銀三兩書識紙張雜費每月共支給庫平銀

十兩均不計建總其月支庫平實銀六百零六兩自六月一十到  
滬之日起支按月由海關道庫給發作正開銷除咨總理衙門暨  
戶部備案外所有京營弁兵奉發到蘇分派各局學製外洋火器  
酌定應支薪水等項各緣由理合繕摺陳伏乞

皇太后

皇上聖鑒訓示謹

奏

攻克湖州詳細情形並克復四安廣德

同治三年八月初五日

奏爲攻克湖州西路官軍先奪大德橋尹隆橋要隘痛剿竄賊詳細情形並各軍分路猛攻克復浙江四安鎮及安徽廣德州城恭摺馳陳仰祈

聖鑒事竊湖州克復西路官軍大略戰狀及劉銘傳各軍進攻廣德經臣於七月二十九日馳報在案先是尹隆橋賊壘屢攻不下郭松林楊鼎勳劉士奇王永勝等會議以賊聚守一處無隙可乘須避實擊虛改由後路抄入七月二十五日郭松林飭李長樂等派隊出哨青草鵝一帶聲言由洞子門進攻八字橋以分賊勢密令各營多紮木筏乘夜繞大德橋渡河先奪扼橋賊壘仍用炸礮聲攻尹隆橋使賊首尾莫顧是夜劉士奇令張家瑜譚正武沿北岸小河二道趨築浮橋令張正奎左日昇等除隄內荆棘葺葺修

整馬路二十六夜二鼓時密令各營擡木筏下河用長纜大錨層層聯繫直接南岸官塘劉玉龍礮隊排列尹隆橋前不時轟擊葉廷杓龔生陽王萬釗周河清率隊吶喊開放鎗礮李長樂文茂林顏邦桂派隊由洞子門登山多用火箭噴筒下擲作攻八字橋之勢郭松林楊鼎勳劉士奇王永勝均於大德橋親督于奇泮陳曰有廖德旺陳有昇舒義志張遵道覃洪陞等六成隊銜枚疾趨飛渡過河三面圍攻橋邊逆賊大驚潰我軍拔樁踰濠爭先擁登逆賊悉數擒斬訊賊供稱偽王相李紀才離此三里依山紮營十餘座當派張家瑜駐守此壘飛速率隊往攻並分軍備剿虹星橋尹隆橋兩面援賊進及里許正遇賊隊前來我軍奮呼衝擊賊不能支回奔山下入營拒守繼見我軍圍急遂相率開營跪降計大德橋及沿山賊壘於五鼓時一律掃平劉士奇令所部各營移紮

南岸官塘郭松林等派隊依護於是山湖州至西安廣德之路遂斷二十七日探知城中賊全股來爭此路郭松林等飛約東路水陸各軍乘機攻城令龔生陽王萬劍葉廷杓三營伏尹隆橋河北李長樂文茂林顏邦桂三營伏八字橋河邊伺隙出擊午刻堵逆黃文金率悍黨數萬由尹隆橋蜂擁而來其勢甚驟郭松林督隊由左首官塘接仗令淮揚水師及王平西礮船沿河助攻王永勝督隊由右首山邊小路接仗楊鼎勳劉士奇督各營從中路迎戰堵逆租臂銜刀率騎馬老賊數百衝鋒數次均被鎗礮擊回仍冒矢突煙驅眾猛撲經郭松林王永勝左右夾擊楊鼎勳劉士奇直搗中堅各營官衝突入陣斃賊二三千人堵逆見勢不支率眾回奔追至橫塘渡尹隆橋適龔生陽等從北岸猛攻礮逆拚死相拒郭松林等麾軍從後圍抄立破堅壘十餘座擒斬千餘人淹斃無



算李長樂亦乘勝攻取八字橋其潰圍之賊知湖城已被四安文  
不得去遂折而逃南突分兩股一從北岸一由河南盪向港口小  
溪口梅溪一帶直趨安吉郭松林等飛派李長樂文茂林顏邦桂  
三營從城隍山略取湖州一路郭松林率隊由八字橋渡河追勦  
王永勝山塘口河北向港口追勦楊鼎勦由尹隆橋向小溪口追  
勦劉士奇由大德橋向梅溪追勦王永勝追至港口拆斷浮橋適  
郭松林踵至南岸賊約萬餘悉信山谷聚殲無遺劉士奇楊鼎勦  
追至小溪口及安吉縣之梅溪鎮郭松林王永勝亦至四面圍殺  
伏屍二三十里河水皆赤僞列王等逆酋皆死焚奪賊船千餘隻  
旗幟器械馬匹無數生擒逸賊萬餘救出難民數千人餘賊尙匿  
梅溪山間因夜間陰雨泥滑軍士勞苦暫就民房休息仍擬人山  
搜勦此七月二十五六日郭松林等軍奪獲大德橋賊壘先斷湖

州西崑四安之路二十七曰湖城克復又截勦城中悍賊踏平西  
路賊壘連夜追賊南至梅溪大獲勝仗之情形也前由溧陽調紫  
長興之道員吳毓芬於二十七日探知湖賊出竄恐其分股由林  
成橋以達四安當於是夜親帶洋鎗隊八百名冒雨宵出並派羅  
義勝選水勇六十名擡小舟數隻隨行黎明馳抵觀音橋賊尙未  
知我軍用小舟渡過數十人賊驚惶戰吳輔仁張裕文踰濠拔椿  
躍上營牆連擲炸彈吳毓蘭揮兵乘之萬國本帶數十人梟水直  
撲賊營賊大駭潰斬殺溺斃百餘人吳毓芬見要隘已得令吳毓  
蘭羅義勝循河南攻午山橋賊營自帶陳占榜余嘉鼐周金海等  
由河北進攻林成橋賊阻橋爲營復有小營倚角吳育仁用炸礮  
排擊連環疊發斃賊無數死拒不退迨吳毓蘭已由午山橋攻破  
二營繞至林成橋南賊始棄營狂奔向四安而走吳毓芬整隊急

追二十里遙見路南山徑中賊多如蟻盡向西奔沿路斬擒七八百名投降千餘器械糧輜拋滿道路未刻追至四安該逆於河北紫三營河南二營竄賊麇集船隻塞河營賊四五千行列隊迎拒復出二三千人由河南沿山繞抄我後吳毓蘭急帶洋鎗隊二百人設伏路南柳林以十餘騎誘賊賊果涉水擁至伏兵起擊我軍隨後掩殺吳毓蘭率萬國本席正賢數騎衝入賊隊大呼降者不殺跪降千餘人河南二營之賊驚潰吳毓蘭令河北陳占榜連環開鎗嚴陣進逼余嘉鼐熊克明鼓噪乘之連破三營追殺五六里時已申正弁勇一日夜冒雨轉戰八九十里計殲斃賊目數千擒斬千餘解散三千餘人奪獲偽印八顆小賊船一千餘隻此二十八日吳毓蘭一軍由長興觀音橋追剿直破四安及沿路賊壘之情形也劉銘傳督軍於二十五日抵建平查勘建平至廣德河路

不通運糧甚艱並探知廣德踞賊在城外築壘增濠遂於建平布  
置糧道先令周盛波黃桂蘭張志邦等移紮離建平四十里之白  
茆嶺水口二十八日自率劉盛藻黃申元等至桃成鋪二十九日  
黃桂蘭張志邦等率三成隊及馬隊至城邊橫山頭城賊出隊迎  
拒我軍鎗礮齊發戰不逾時賊遽返奔追至西門適臣先調現守  
溧陽之周盛傳亦派行隊助剿並抵北門城逆見我兩路並進遂  
率大隊由南門出走我軍分路兜殺擒斬數百名餘匪向甯國安  
吉山中竄去日暮路險我軍隊伍過單未便窮追遂將廣德州城  
克復劉銘傳商派周盛波黃桂蘭等入城駐守此二十九日劉銘  
傳等克復安徽廣德州城之情形也據各路將領陸續稟報前來  
伏查湖州踞逆恃有西面官塘窰路節節爲營是以負嵎不下自  
浙軍分攻安吉臣與左宗棠函商由臣軍橫截尹隆橋大德橋要

監並進廣德以扼其吭而攻其心郭松林等於二十六夜先克大  
德橋賊壘堵逆見咽喉將斷果爲背城一戰之舉旣不能西乃折  
而南圖竄安吉據劉銘傳訊賊供稱廣德四安餘匪僉約初一日  
至安吉會齊幸各軍神速猛進沿途敗賊大股受創從萬山叢雜  
中逸出無多糧輜輻重拋棄殆盡前路徽浙交界各有截剿之軍  
當不難以次撲滅此次統領湖州西路官軍之記名提督福山鎮  
總兵郭松林南贛鎮總兵王永勝古州鎮總兵劉士奇記名簡放  
提督總兵楊鼎勳統領廣德官軍遇缺提督周盛波苦戰出  
奇力截要隘肅清蘇浙功績甚多郭松林王永勝劉士奇均已於  
常州克復案內蒙

恩賞穿黃馬褂伏懇

聖裁優加獎勵江蘇補用道吳毓芬請

賞加按察使銜此外尤爲出力各員另繕清單恭呈

御覽陣亡之游擊杭進先擬保守備葉雲龍請

旨敕部照陣亡例從優議卹其餘應獎應卹人員仍容臣查明彙奏所有攻克湖州西路官軍追剿竄賊詳細情形並分攻廣德四安次第克復各緣由由驛馳陳伏乞

皇太后

皇上聖鑒訓示謹

奏

銘軍擊賊甯國孝豐安吉界內摺

同治三年八月二十三日

奏爲劉銘傳等軍分路追剿竄賊直抵甯國孝豐安吉三縣界內沿途擊散賊股實在情形恭摺覆陳仰祈

聖鑒事竊攻克湖州廣德四安追剿梅溪竄賊各情形經臣於初五日馳報在案旋奉八月十三日

寄諭命臣飛調兵勇出境追剿並黃逆洪幼逆下落查明具奏適續據劉銘傳等報稱自七月二十九日廣德克復後三十日巳刻黃文金率賊三萬餘人由四安旁路直趨廣德東門頭隊徑至城下叫呼蓋猶未知城賊已走也當經周盛波黃桂蘭各帶隊由南北兩門出擊賊大駭潰適周盛傳率隊自劉洞橋來城正抄賊後夾攻殲殺無算黃逆行至離城三十里之界牌聞信折由南面繞竄計廣德中路達孝豐左路達安吉右路達甯國劉銘傳等遂議

三路追剿初一日五鼓劉銘傳率黃桂蘭張志邦等躡蹤緊追傍晚始抵孝豐縣界之劉村正遇賊隊擒斬數百名獲馬數十匹據賊供卽黃逆黨眾初二日黎明劉銘傳伏兵山谷中伺之辰刻賊果蜂擁由原道而來俘賊指騎白馬者爲黃逆伏兵發喊齊起賊駭而奔三江兩湖人俱倒戈乞降斬馘解散二千餘人白馬賊被擒實非黃逆乃其部僞大將也黃逆尙在後隊聞前隊殲除率眾退入山內劉銘傳親率洋鎗隊二百餘人追尋蹤跡行甫數里山凹中忽出悍賊二千餘人攔放排鎗劉銘傳奮力迎擊相持許久黃逆殊死戰我軍傷亡百餘人幸黃桂蘭帶隊接應賊由山僻小路且戰且走追十餘里峻嶺崎嶇時已日暮遂收隊回是日周盛波率隊追至甯國縣境搜獲擒斬四千名周盛傳追至安吉縣境僅搜獲零星逸匪據探賊蹤已去遠矣其二十八日攻克四安



之道員吳毓芬當就賊遺營駐守是晚探知又有梅溪大股繞至三鼓時親率吳毓蘭余嘉龍萬國本周金海等鎗隊四百名扼橋嚴陣以待五鼓賊來未知四安已駐官軍徑前相問我軍誰稱僞昭王之眾俟近排鎗擊之賊出不意狂奔折回自相蹂躪死傷塞途乘夜追十餘里二十九日黎明及之賊散滿山谷無復隊伍皆棄械跪降斬頭目十數人解散約四千餘人驅回長興一路分別資遣三十日復帶隊搜山有騎馬賊酋二十餘盡殺之又散去四五千入適浙江藩司蔣益澧督隊前來商山浙軍駐守吳毓芬遂回長興臣查自湖州四安梅溪廣德連日俱克浙軍又克安吉我軍網張三面潰逆無路穿走沿山亂竄幾難辨爲何股自二十七至初二日處處追兵趕及陰雨路滑賊糧棄盡飢寒疲困紛紛乞降連日擒溺解散實有五六萬人綜度前後賊情及各路軍報

踞廣德之黃文英若挾洪幼逆出竄則二十九日已入甯國縣界  
早赴績溪而去堵逆黃文金三十日始由梅溪山中折向廣德與  
幼逆已不能合又經我軍迎頭痛擊而吳毓芬擊散之眾更爲別  
股據劉銘傳報稱初二日獲賊訊供僉稱堵逆黃文金是日實鎗  
斃於陣埋屍甯國鄉間所部死黨二千餘人行糧已盡狼狽不堪  
歸楊逆帶去欲由徽境竄江西等語黃文金在賊中最高悍既  
據賊供伏誅其漏網之眾卽再詭託名號黨羽無多兇醜大減左  
宗棠已飭調多軍分由江皖兜剿似可漸次撲滅臣軍現在分布  
廣德建平東壩溧陽宜興等處除仍酌察動靜相機調度外所有  
劉銘傳等軍出境分路追剿沿途擊散賊股各情形謹遵  
旨詳細覆陳伏乞

皇太后

皇上聖鑒訓示謹奏

陳明蘇省兵餉片

同治三年八月二十三日

再臣初到上海所部水陸不過萬人前任移交兵勇四萬多不能  
戰除當時被賊衝潰外其餘悉數裁汰而賊勢浩大夷情詭變臣  
不自揣量妄思分路進剿以振

國威而伐敵謀然與曾國藩上游之師左宗棠浙東之師相去千  
餘里中隔賊巢孤立無援不能不陸續添募求自強之術方議分  
三大枝進取一由太倉崑山進蘇州則程學啟與戈登常勝軍當  
之一由常熟進江陰無錫而達常州則劉銘傳李鶴章郭松林等  
當之一由浦東金山衛進浙江之平湖乍浦而達嘉興則潘鼎新  
劉秉璋等當之同治二年夏間臣處陸軍六萬人募練甫齊相輔  
並進八月以後忠逆李秀成由金陵同援糾合侍逆李世賢輔逆  
楊輔清護逆陳坤書聽逆陳炳文等大股六七十萬分撲前敵各

營叛匪白齊文又爲忠逆募洋匪數百搶小輪船三隻助守蘇城軍情危急萬狀仰賴

聖主威福以次勦平亦由兵敗較眾軍火鎗礮較精各將士均尙奮勇效命非臣所能爲力也惟是添募愈多需餉愈鉅臣抵滬時薛煥吳煦皆以上海稅捐養現兵五萬斷斷不敷督臣曾國藩軍餉尙不能稍分接濟此外撥款更無絲毫能給臣接手後逐漸添營多方購備外洋鎗礮用度更繁又值漢九開關滬稅大減之際因於釐捐一項加意整頓敷衍至今幸未譁潰而臣軍去年僅欠四箇月口糧今年已逾八月乃祇發過四箇月之餉僅及半關臣惟激勵各軍忍飢血戰不敢瑣屑上

聞自去冬以來金陵攻勦喫緊准督臣咨令月撥四萬兩臣卽督同滬上司道按月勉力分濟鎮江每月三萬則解至今年夏間爲

止今全省雖就肅清而被擾各屬人民稀少田野荒蕪蚩蚩子遺仍多凍餒而死臣職司守土方救死扶傷之不暇日與官紳謀所以招墾撫卹之方但苦無款可籌何忍於災區再有股削以是拓土雖廣而用財更多取利益薄竊恐外聞不知輒謂肅清省分指撥要款必致無可撥解上煩

聖慮此臣不能不豫爲陳明者也至江西餘氛未殄有鮑超左宗棠各軍分投追剿自應無需添兵臣軍暫守境上如一兩月後賊無回竄信息當分別裁撤酌留洋鎗炸礮隊三萬人以備海防而資控守藉可節省餉需惟各軍積欠太多一經凱撤必須酌補口糧以爲行資司道各庫及各釐局隨收隨放毫無存儲未知能否設法借墊按月扣還容臣督籌妥辦續行具奏所有蘇省兵餉籌辦大略緣由理合附片據實陳奏伏乞

皇太后

皇上聖鑒訓示謹

奏

欠解三成船鈔請歸本省軍需造銷片

同治三年八月二十三日

再各關所收船鈔銀兩係按三月一結扣存三成解京以充同文館經費計江海關已解至第九結止其自同治元年十一月十二日第十結至三年五月二十七日第十五結歷結應解此項三成銀兩均經臣於奏報關稅摺內附片聲明扣存在案前據署蘇松太道丁日昌稟查前關道黃芳任內未解三成船鈔銀六萬三千十三兩零前代理關道應寶時任內未解銀一萬五千六百四十六兩零此係扣存解京之款即經札飭黃芳應寶時按數繳解去後茲據黃芳應寶時會同稟稱江海關徵收稅課業蒙

奏明留抵本省軍需奉部核准在案前項三成船鈔本當按期解交總理衙門惟黃芳等在任時正值軍務緊急需餉孔殷關庫每月應放款項如鎮江協餉常勝軍用款以及英法教練洋鎗勇糧



等類均係刻不容緩關稅不敷動放不得不移緩就急通融籌墊  
致將提存三成船鈔銀兩挪動墊放當動墊之際原期嗣後收數  
稍旺於放款內節省提還積總起解乃兩年以來洋稅較前大減  
而本年克復常州後裁撤常勝軍計發月餉賞卹盤費等項共用  
銀十數萬兩搜羅一空此項三成銀兩遂絕無彌補之望黃芳應  
寶時先後各已卸事無從籌還繳解至動墊各款均係奉文正支  
正解確有批領可憑可否將前項三成船鈔共銀七萬五千九百  
五十餘兩

奏請免解歸入本省軍需案內作正造銷等情前來臣查滬關入  
數本屬不敷支放臣部勇丁口糧專指本省釐捐近歲以來每月  
僅放半關飢潰可虞遇有米藥鉅款及采買外洋鎗礮尙須由關  
庫通融籌發是以江海關從前代徵漢九兩關稅項積至二十餘

萬代收太平杭贛三關絲稅亦幾及十餘萬均已隨時動撥無從籌扣該前關道黃芳等於任內扣存三成銀兩暫時動墊本欲接續提還積款既鉅無法能歸尙係實在情形當軍需急迫之際得有借墊之款實於軍事大局有裨卽如輪船經費五十萬兩應行解京之款蒙總理衙門奏撥金陵軍餉遂收戡定之功似總理王大臣深以東南軍需爲重凡在行間同增感戢惟此項應解同文館經費亦係待用要款先經嚴飭黃芳等趕速繳解本不敢以留抵軍需爲詞遽爲不情之請無如欠解數逾七萬再不截清界限卽下結起解之款亦致轆轤思維全再惟有據實陳明除飭丁日昌將下屆結期扣存銀兩卽速報解外所有黃芳應實時任內未解三成船鈔銀共七萬五千九百餘兩可否准其免解留抵江蘇本省軍需出自

天恩除咨呈總理衙門察核外理合附片具陳伏乞

聖鑒訓示謹

奏

克復蘇省並浙江各城彙案保獎摺

同治三年九月初三日

奏爲遵

旨查明克復蘇州省城及江陰無錫金匱等縣楓涇西塘平望等鎮並浙省之平湖乍浦海鹽各城及歷次血戰解圍出力之水陸各營文武員弁兵勇地方團練員董彙案保

奏恭摺仰祈

聖鑒事竊照蘇省水陸官軍於同治二年七月內克復楓涇西塘八月初一日克復江陰縣城十六日攻克蘇州之寶帶橋八月杪解大橋角之圍十月初九日攻克泔墅關虎邱等處賊營二十六日克復蘇州省城十一月初二日克復無錫金匱縣城初八三十四等日收復浙江之平湖乍浦海鹽各城二十三二十四等日攻克平望鎮及九里橋黎里等處賊壘十二月十四日解奔牛之

圍此皆上年七月以後事也所有歷次戰狀及克復詳細情形節經奏明欽奉

諭旨准將出力員弁兵勇查明彙奏請獎在案先後恭錄咨行水陸各營一體欽遵辦理其十一月二十八日收復嘉善縣城一案已將降酋陳占榜余嘉鼐隨摺請

旨給以虛銜其餘降眾及在事出力人員應量加獎勵至克復蘇省及江陰錫金等縣均有團練紳董助剿得力應一併請獎茲准提臣黃翼升李朝斌劉銘傳並各路統領及會帶常勝軍之戈登李恆岳等查明勞績秉公彙保分別開單請奏前來臣覆加察核嚴爲刪減分繕清單恭呈

御覽伏查東南之賊勢若長蛇以蘇州爲腹地巢穴金陵杭州遂爲首尾之救應臣由上海偏隅節節進攻時時苦戰其間變態險

狀百出不窮仰賴

景運中興

聖謨廣運使該逆謀細力竭得以恢復蘇省聚殲羣醜翦其枝葉而披其腹心似爲軍務一大關鍵至江陰無錫兩城均蘇州之咽喉常州之屏蔽賊所必守我以力攻而得之殺賊尤眾其收復浙江之平湖乍浦海鹽嘉善各城出境勦賊望風投降足以掣動嘉杭賊勢於大局亦有關係中外水陸各營將士及隨營襄事各員均屬齊心一力勞績卓著論功行賞臣何敢稍有遺漏惟大小百數十戰水陸百數十營併案彙保人數較多減無可減惟有仰懇天恩破格優獎以昭激勸除應保千把總外委各員及擬給弁勇藍翎弓造花名清冊咨部外所有遵旨查明歷次出力員弁彙案保奏緣由謹繕摺由驛具陳伏乞

皇太后

皇上聖鑒訓示再籌餉出力員董實於緊切軍需有裨三載以來  
多未甄敘不足以資鼓舞茲據捐釐總局司道彙詳請保臣遂細  
酌核另繕清單併乞

訓示施行謹

奏

馬格里請賞三品頂戴片

同治三年九月初三日

再上年有英國兵官馬格里由常勝軍改赴臣營投效當令教練西洋鎗礮隨隊攻剿頗爲得力因於二月間權行給予四品頂戴以示獎勵旋卽設局仿造西洋火器委副將韓殿甲知州劉佐禹會同馬格里悉心講求所製開花礮彈無遠不中無堅不摧得以克復蘇州等城厥功甚偉該兵官欲得中國官職以爲榮寵相應請

旨將英國人馬格里

賞給三品頂戴俾於製造教練等事倍加奮勉軍務不無裨益理合附片陳明伏乞

聖鑒訓示謹

奏



奏保陳鼎片

同治三年九月初三日

再臣隨營文案藍翎五品銜候選通判前翰林院庶吉士陳鼎學  
義深邃講求經濟於政治之不源戎機之樞紐地輿之形勢無不  
洞悉要領咸豐九十年間臣與該員同在曾國藩幕中相處最久  
深知其人曾國藩尤爲賞識東征以來事無鉅細皆與之商推旋  
爲前湖北撫臣胡林翼前安徽撫臣李鴻章招致戎幕均相倚重  
久欲薦之

朝廷任以吏事惟該員淡泊性成諸臣不欲相強臣抵滬後卽敦  
請來營凡治軍籌餉諸大端隨事諮商該員剴切敷陳持論精卓  
贊畫之力實多現在江省肅清從征諸將均荷

聖恩至優極渥因念該員從軍最久懋著賢勞可否破格

施恩以道府存記擢用並換戴花翎以示優異臣爲激勵人才起

見聖旨附片具陳伏乞

聖鑒訓示謹

奏

北洋豆貨上海一口請歸華商轉運摺

同治三年九月初十

奏爲北洋豆貨上海一口請仍歸內地商船轉運恭摺具陳仰祈  
聖鑒事竊照北洋豆石開禁經臣於同治元年夏開附片奏請專  
將上海一口歸內地商人運銷由總理各國事務衙門議覆俟蘇  
松各屬肅清再與英公使商量踐守舊約奉

旨依議在案茲據江海關道丁曰昌轉據船商郁森盛等聯名稟  
稱上海一隅之地沿海居民多藉船業爲生自西洋各國議准通  
商上海一口最爲繁盛良由沙衛各船羣聚貿易始得交易流通  
商賈輻輳若令內地商人均已乏本停歇洋商亦豈能獨獲通商  
之利惟沙船運銷貨物向以豆餅豆石爲大宗舍此無可販運是  
以和約內有外國船不准裝運牛莊等處豆石一條雖爲沙船留  
一養命之源實欲保全上海市面爲各國通商經久之計自同治

元年暫開豆禁夾板洋船直赴牛莊等處裝運豆石北地貨價因之昂貴南省銷路爲其侵佔兩載以來沙船貨本虧折殆盡富者變而亦貧貧者絕無生理現在停泊在港船隻不計其數無力轉運若不及早挽回則沙船停泊日久船身朽壞行駛維艱業船者無可謀生其在船者舵水手十餘萬人不能存活必致散而爲匪肆行搶掠商賈難安上海市面既廢卽洋商貿易亦難前曾稟求轉詳奏准照會英國公使專將上海一口豆石仍歸內地商人運銷旋據英公使而稱現因撥兵在滬防剿恃此以濟軍需俟賊稍平再行議辦並蒙總理衙門覆奏俟蘇松各屬肅清再與商量踐守舊約各在案現今江蘇通省均已肅清英國防兵亦漸撤退彼國以信義爲重公使既有言在先定不失信環求轉詳奏請敕下總理衙門照會英國公使仍守舊約以全大局等情並據該

關道會同捐釐總局議稱登州牛莊兩處豆石豆餅向不准外國  
商船裝載出口天津新定條約載有明文原因內地商船南北經  
營必有回貨可裝始不徒勞往返而登州牛莊兩處惟以豆石豆  
餅爲大宗貨物舍此別無可裝之貨是以申明條約爲船號各商  
及舵水人等特留養命之源旋值北洋防務緊要開資協衛據英  
國公使節次聲請始奉總理衙門奏准開禁以示寬大從此兩處  
豆貨一任外國商船及時轉運沙船自北回南非不裝豆特其經  
歷重洋遠不逮夾板洋船之迅速進口遲而銷路轉隘市價減而  
保本愈難漸致資本虧盡現在上海沙船因無貨不停泊在港者  
無數稅捐短絀實由於此將來船身朽壞無力重修勢必日就廢  
棄各船商具有身家卽能束手待盡而耆舵水手人等藉此謀生  
者數至十餘萬人別無恆業至於生計盡絕難保不鋌而走險萬

一剽掠橫行爲害行旅外國商人亦豈能安享其利諺所謂主富則客安主窮則客困該船商等所稟自係實在情形夫以火輪夾板等船往來外洋各國通商各口利權在握無地不到無貨不裝卽不轉運油豆餅三件亦無所損而上海各項船隻僅能駛赴北洋又專藉此以營什一之利其關係實非淺鮮既蒙總理衙門議俟蘇省肅清商賈前約英公使威妥瑪亦有賊平議辦之說現在蘇省軍務大定正船號各商暨耆舵水手十餘萬眾想望更生之日惟有據情詳祈奏請

敕下總理衙門照會英國公使酌量定議請將登州牛莊兩處豆貨查照前約專歸內地商船轉運似此量爲變通於華商生計稍留餘地而洋商互市亦可永遠相安卽海關稅捐長有裨益各等情前來臣查核原詳所引主客之喻最爲透澈上海爲通商口岸

適中之地各國商船涉歷重洋會集於此自必樂與中國商船彼此相安而後主客共獲美利斷無內地商船盡行廢棄而洋船可以獨享其利之理連年上海用兵各船商於困苦不堪之時竭力助餉原冀賊平有日復守舊章今東南大定英兵漸撤若仍不議復前約則船商自此絕望耆舵水手十數萬眾無復生理興言及此可爲寒心且僅以上海一口豆貨專歸內地商船運銷於洋船生意初無甚損而市面日旺中外熙攘和樂實於洋商亦有利益斯則通商立約之本意非有所偏厚偏薄於其間也伏祈敕下總理衙門照會英國公使酌議施行除咨總理衙門外所有北洋豆貨上海一口請照前約歸內地商船轉運緣由理合繕摺具陳伏乞

皇上聖鑒訓示謹

葵



收回北洋豆利保衛沙船片

同治三年九月初十日

再據江海關道丁日昌月稟稱所有沙船壅塞情形業經詳請察核具奏特其中尙有大可慮者查江浙兩省漕米改歸海運向由沙船裝載赴北現在軍務雖有端緒而河運一時難復舊章東南漕糧必賴上海沙船起運今沙船無貲販買停泊在港者以千百號計內地船隻以運動爲靈若半年不行由朽而爛一年不行卽化有爲無矣將來無力重修全歸廢棄海運從何而辦此事非特上海商民市面以及捐稅攸關且於

天庾正供大有窒礙長貽後患何可勝言不得不急爲挽回以期通漕運而裕賦稅惟此層關係與彼族無干未便形諸稟牘使外國因我情形別生枝節等語臣查該道所稟切中利害非將上海一口運銷北洋豆貨之利設法收回則商船生意斷無轉機卽海

運關稅一切毫無把握惟洋人趨利若鶩該公使必多方狡執總理衙門原難以口舌相爭因係條約所不准行威妥瑪曾有俟賊平再行議辦之語臣不得不據滬上官商公論剴切上陳或可乘機轉圜於

國計民生均有裨助謹附片密陳伏乞

聖鑒訓示謹  
奏

擬案請發餉票找抵欠餉片

同治三年九月初十日

再日下江浙肅清軍務大定臣部勇丁擬酌量遣留前已附片奏明在案查臣軍糧餉專賴松滙及蘇屬釐捐接濟瘡痍之後進款總無起色各軍口糧向係前後牽算壓放只及半關三年以來統計欠餉已七八百萬兩兵勇連年苦戰恢復全省功成之後一旦遣歸別無希冀只此應得找欠之項合之總數固爲鉅款分之各勇仍屬無幾既無折扣之理更無籌補之方前准江甯將軍富明阿咨以江北水師裁船欠餉請援照鎮防成案一律給發餉票准予請獎亦准其移獎親族子弟毋庸令加二成實銀以示體恤將來江北陸軍裁撤並照章辦理各等因臣當卽分行營務支應各員會同各統領議商蘇軍裁撤能否仿照鎮揚各軍現案辦理據議稟復欠餉既鉅只有按照程途遠近酌補現銀以爲行資其

餘欠項以票給抵准其請獎並移獎親族子弟惟鎮營餉票抵欠辦法係查照皖北軍營章程准照籌餉事例減成銀數執持餉票具呈請獎曾經部議加以二成實銀此爲軍營未經裁撤常行之例此次富明阿援照奏辦復以該官兵等既不能實領欠銀僅得餉票而於報捐之款仍令加實銀殊不足以示體恤蓋裁兵宜於速散欠餉利在速清若令以現銀加成請獎則積欠久困之勇丁從何得銀必至報捐遲滯裁勇因此觀望久聚不散尤恐別滋事端此加收現銀一層與清釐欠餉之意適爲相左而不能相成者也故欲籌補欠餉體恤兵艱必須餉票流通而欲餉票收捐迅速必須無庸加收實銀如此權宜辦法無論裁撤之勇固可截數找補卽留防之軍亦得積清積欠其餉票赴捐應作實銀收捐核照籌餉事例減成銀數請獎不必加搭實銀則兵勇得票如得實銀

不致久欠難結於

國計毫無虧損而軍需亦易清楚但向來捐案稟奏甚緩更宜加意鼓勵按三月一卯出

奏則捐生自必踴躍裁兵亦利遄歸各等情由蘇藩司劉帥督覆核議詳請

奏前來臣查所議尙爲妥協合無仰懇

天恩俯准照辦並敕部知照施行所有援案請發餉票找抵欠餉並照實銀收捐緣由理合附片陳明伏乞

聖鑒訓示謹

奏

撥借甘餉三萬兩

同治三年十月初七日

奏爲江海關奉撥甘省餉銀擬先措銀三萬兩劃解楊岳斌軍營募勇赴甘以應急需而抵撥款恭摺陳仰祈

聖鑒事竊臣承准議政王軍機大臣字寄同治三年九月十五日奉

上諭陶茂林一軍剿匪正在喫緊該營餉項急應廣爲籌備所有江海關海兩關各撥銀五萬兩著李鴻章英桂如數籌撥解交陶茂林軍營並著路秉章將上年指撥甘餉五萬兩按糧津貼銀數萬兩如數措解陶茂林軍營交納等因欽此仰見

皇太后

皇上廬念嚴疆廣籌軍食之至意查江海關入不敷出及臣軍餉項支絀各情經臣歷次陳明久邀

聖明洞鑒自蘇省肅清以後臣即擬裁軍二三萬以節餉需續准督臣曾國藩緘商謂臣部分防各軍不宜遽撤兼之欠餉太鉅驟難籌補尙未果行而水陸諸軍待哺嗷嗷江海關稅款仍隨時撥濟本省軍餉無餘惟甘省軍務正緊既奉

特旨飭催雖萬難籌措之中應竭力稍爲籌濟陶茂林未知現駐何處自蘇解餉赴甘須由徐州河南山陝各省繞道前進賊氛梗阻恐致節節稽延適陝甘督臣楊岳斌自江西軍營遣記名總兵楊作霖齎函來蘇備言體奉

諭旨催令帶兵赴甘回匪勢甚猖獗即須赴楚募勇萬餘製備器械棚帳酌攜三箇月行糧一時無可取給屬臣代籌鉅款並懇擲交來員解回湖南以濟以勇急需等語臣查楊岳斌此次奉

旨赴甘因兵餉棘手未能剋期就道若不就近協助勢難成行昨

准左宗棠來函亦以該督專弁赴浙求助爲言而蘇省竭蹶奈無餘款可以籌畫再四思維前項奉撥銀兩同一甘省軍需而楊岳斌情尤急迫自應移緩就急由江海關撥銀三萬兩交該總兵楊作霖星夜解回楊岳斌軍營俾得早日募勇赴甘卽抵作奉旨飭撥甘省之款至陶茂林軍餉旣奉撥關海關五萬兩又奉旨飭四川速解大批濟用當不致停兵待餉現在蘇軍未撤徧地瘡痍實在力難兼顧非敢稍有推諉致干咎戾再正在繕摺開奉到十月初一日

寄諭飭臣速撥楊岳斌募勇銀十萬兩查楊岳斌指撥各省多係有著之款募勇行糧計可敷用蘇省協撥三萬已屬勉顧大局合併聲明所有劃解甘餉各緣由專摺覆陳伏乞

皇太后



皇上聖鑒訓示施行謹

奏

監臨鄉試片

同治三年十月初七日

再欽奉九月十九日

寄諭十一月舉行鄉試李鴻章能否馳赴江甯入闈監臨如不克入闈藩司萬啟琛能否代辦或者明安徽學政朱蘭代辦均由曾國藩李鴻章迅速籌商奏明辦理等因欽此仰見

聖慮周詳無遠弗屆臣查本年補行鄉試督臣曾國藩爲激勵士心招徠商民起見例應輪派蘇撫監臨臣本無所推諉惟地方甫經肅清誠如

聖諭善後各事仍需次第籌辦恐難分身久駐金陵而臣自同治元年三月開駛赴上海與曾國藩睽違已久雖函牘常通軍務地方一切應行興革事宜尙有必需面商之件卽今屆科場百凡草創亦應親往協力籌辦現在閏期已迫監臨爲文場主持承辦之

官吏赴考之諸生豈能無所稟承曾國藩來函以安徽學政向無代辦之案誠恐呼應不靈萬啟琛本任提調事件日不暇給不能更兼監臨催臣速往會商等語臣擬於十一日由蘇州帶印起程馳往仍將監臨應辦事件次第籌備俟至江甯與督臣妥商如須入闈應於三場事竣先行回蘇未便循例坐候鈐榜致誤本任要公容會同督臣奏明辦理再士子雲集例由學政錄科送試江蘇學臣宜振尙無到任確信臣已咨明漕臣吳棠迅催宜振於蒞任後速赴金陵如該學政仍未抵任恐有貽誤即將學政關防書吏文卷委送金陵由臣就近暫行權宜代辦是否有當伏乞

聖鑒訓示謹附片具

奏

蘇太分建考棚片

同治三年十月初七日

再據蘇州府太倉州紳士前右春坊右中允馮桂芬翰林院修撰徐郁等呈稱蘇太兩屬考棚向在崑山前明時係巡撫行臺借以校士或調往江陰就試本無一定

國朝順治年間定爲歲試在崑山科試在江陰雍正三年以後始均在崑山考試現崑山考棚已被賊毀蘇屬紳士欲就府城創建考棚太倉昔屬蘇州同一考棚自升爲直隸州後出境辦考本多未便若仍令赴蘇考試道路既遠且所屬崇明渡海而來愈益遼闊寒士乏於資斧尤宜體恤是以太倉紳士亦願於州城自建考棚業經會議允洽呈請核辦前來臣查蘇州省會本應另建考棚從前蘇太兩屬均於崑山彙試實係一時權宜遷就之計太倉既升直隸州照例亦應分建既據該兩屬紳士會商呈請當此全省

肅清須及時興修文教自應照議籌辦於該府州城各建考棚以順眾情除飭司轉飭各該地方官擇地鳩工舉董籌捐迅速建造外謹會同協辦大學士兩江總督一等侯臣曾國藩附片具陳伏乞  
聖鑒謹  
奏

豁免江甯七縣錢漕捐

同治二年十月二十五日

奏爲遵

旨查明江甯克復後地方困苦情形援案請將該府所屬七縣錢漕豁免三年以廣

皇仁仰祈

聖鑒事竊准部咨同治三年六月二十九日奉

上諭咸豐三年洪逆竄陷江甯省城竊據者十有餘年百姓遭其荼毒慘難言狀或被賊裹脅而鋒刃頻羅或轉徙他鄉而溝壑難免蚩蚩何辜罹此殘酷現在江甯克復全省底定亟宜渥沛殊施廼此遺孑苦曾國藩李鴻章查明江甯地方應徵錢漕分別應蠲應緩據實入奏候旨施恩該督撫等務當實力詳查毋任官吏從中弊混以副朝廷軫念殘黎因時施惠至意欽此仰見

聖慈垂念災區痼疾在抱臣等莫不欽感遵查江南爲東南第一省會田土本非饒沃咸豐三年省垣雖各屬縣先後被陷土庶爭先殉節深明大義自僞都竊據閩十二年羣賊南北往來擄脅焚戮之苦百倍他處咸豐六年十年間大營兩次潰退賊眾更肆焚掠於是附近數百里內幾無一寸安靜之土今幸克復金陵普天同慶而該處被害至慘且久田疇荒廢人民稀少非休養生息三數年別無權宜補救之方臣等遵

旨詳查茲復暗商再四擬援照常州武陽等縣豁免錢漕三年之案仰懇

恩綸特沛將江甯府屬上元江甯六合句容江浦溧水高淳七縣錢漕自同治四年起一律豁免三年至同治七年再行起徵以甦民困而廣

皇仁臣等伏奉到

俞旨謹卽刊刻謄黃徧行曉諭斷不容官吏從中弊混所有遵  
旨查明援案請將江甯府屬錢漕豁免三年緣由合詞恭摺據實  
覆陳伏乞

皇太后

皇上聖鑒訓示謹

奏



請裁富明阿一軍分協甘肅軍餉片

同治三年十月二十五日

再臣等學本

寄諭飭解日省軍餉以東南分濟西北本屬義不容辭惟江蘇各屬蹂躪過久元氣太傷必須加意休養軍務雖定而海疆重地防兵未敢遽撤臣復蒙

恩飭署兩江轄境過寬則兵力尤不可少頃調劉銘傳李鶴章等洋鎗隊萬餘人隨臣國藩進剿皖鄂仍須籌養勁旅以備調撥援應所有蘇滬釐稅等款自應仍照舊章先濟本省軍食至臣國藩所部分駐金陵及皖南者尙有五萬餘人卽蘇皖鹽務釐卡照舊撥解不敷甚鉅仍須臣鴻章隨時設法籌濟查江北淮揚通海各屬較爲完善歷年供支揚防一軍絲毫不能外撥現在襄下河安靜無事楚省逆氛遠距數千里前敵重兵節節扼揚州與金

陵僅隔一江總督既移駐省垣臣鴻章可就近派兵接防臣國藩由皖北兜剿亦無竄越後路之虞如有疏失應惟臣等是問當明阿所部兵勇擬請

特旨飭令分起妥爲遣撤庶騰出江北之餉以一半分解甘省要需以一半分濟皖軍前敵似於大局有裨臣等通盤籌畫爲戡軍節餉起見是否有當伏乞

聖鑒訓示施行謹合詞附片具奏

惠山建立昭忠祠片

同治三年十月二十五日

再據臣部水陸各營統將聯銜稟稱自同治元年相從東下迄今兩載有餘肅清蘇省兼復浙境計先後大小數百戰仰賴朝廷威福未嘗挫衄實由各軍士忠勇奮發效命爭先所有陣亡員弁兵勇共約數千人例應於各府城縣陣亡地方建立昭忠祠設位致祭惟分地建祠經費無措查無錫縣城外惠泉山介在蘇常之間上年進剿錫城與忠侍大股相持數月鏖戰尤苦死事尤眾其地夙號名勝自被賊擾紺宇琳宮悉成瓦礫興復無期請先於山麓天下第二泉之側公議捐助餉銀建立昭忠祠查明歷次陣亡員弁兵勇分別設位由地方官春秋致祭以彰卹典而慰忠魂呈請具

奏前來除咨部立案並飭地方官列入祀典外理合將無錫惠山

建立昭忠祠緣由附片具陳伏乞

聖鑒謹

奏

蘇軍征調分防情形摺

同治三年十一月初五日

奏爲蘇軍征調分防布置情形恭摺奏祈

聖鑒事竊

臣前抵金陵與曾國藩晤商調派淮勇赴皖協剿已於

前月二十五日附片陳明在案當查臣部分紫蘇境十月間業將

總兵熊兆周況文榜所帶貴州兵及記名提督滕嗣武周蘭亭鄭

國魁等各營分別裁撤以節餉需茲飭劉銘傳統所部十六營自

廣德建平提督周盛波等九營自溧陽防所卽日拔隊由蕪湖過

江赴六安霍山一帶相機防剿飭現駐宜興之提督楊鼎勳易用

剛統松勳兩軍拔赴建平等處接防飭常鎮道潘鼎新一軍駐紮

松江塘橋就近節制青浦鳳凰山英國教練鎗礮各隊該隊經戈

登教練日久頗爲整齊戈登頃已回國與英領事巴夏禮商薦英

兵官哲貝接管教練臣飭海關道丁日昌等與該領事兵官堅明

要約只請哲貝等料同操演不令干預營務山潘鼎新兼統其眾並隨時酌派所部一體練習俾壯聲威與上海呼吸相應以鑒中外商民之望署撫臣吳棠接任後蘇境各防如有應行調換之處仍由臣商酌調度臣已於十一月初三日欽遵

諭旨暫行接署兩江總督篆務片疏

題報准吳棠來兩俟交卸酒篆卽赴江甯會商接替巡撫篆務再行赴蘇合併聲明所有布置蘇防大概情形理合繕摺由驛具陳伏乞

皇太后

皇上聖鑒訓示謹

奏

停止攤捐船工片

同治二年十一月初五日

再蘇松太道衙門向設軍工廠承辦提鎮兩標各營戰船所領例價之外賠貼不敷銀兩由道按照在任月日攤捐道光二十五年開經前督臣

奏准改歸省廠委員承辦不敷銀兩仍由該道無分正署按月捐解每年應攤捐銀八千四百三十六兩六錢二分四分毫分季解司撥用茲據署道丁日昌會同前道黃芳前代理道應寶時稟稱此項捐款本藉關稅平餘補苴滬關商稅向以沙衛各船所裝油豆餅爲大宗自咸豐十年洋人復開豆禁洋商轉運較沙船迅速油豆等貨改裝洋船徑達開廣各路卽有到滬之貨亦在新關完納洋稅常關額稅短絀較甚因正課攸關不得不設法賠補正額須賠則無羨餘可知既無羨餘則捐項無著可知且新關洋稅向係

每百兩支銷折耗銀二兩現奉部定新章自同治二年正月爲始  
每百兩准支折耗銀一兩二錢如有不敷由關道自行籌補等因  
滬市歷係通用規銀較之足紋成色低潮洋商以市銀完納關稅  
一經傾銷折耗甚重迥非別關情形可比向支折耗銀二兩今驟  
加核減實有不敷由關籌補已屬竭蹶萬分若再將船工銀八千  
四百餘兩照常攤派實無力賠此鉅款會請

奏免攤捐等情前來臣查此項船工軍興以來久經停辦卽設廠  
造船應動正款不應責令攤捐致成虧挪之漸況上海自通商後  
洋關收數較旺則常關進項必絀今昔情形不同未便仍執定章  
徒滋弊政相應籲懇

天恩俯准將滬關每年攤捐船工不敷例價銀八千四百餘兩自  
同治元年十月以後一律停止俟蘇省建復船廠興造戰船再酌



定經費章程奏明辦理是否有當附片具陳伏乞  
聖鑒訓示謹

奏

豁免攤款摺

同治三年十一月初五日

奏爲蘇省咸豐十年以前攤補清查各款懇

恩一律豁免以消官累而紓民困恭摺奏祈

聖鑒事竊據蘇州布政使劉郁營會同江安蘇松各糧道詳稱蘇

省額徵錢酒最重攤捐款目最多今蒙

恩飭辦理減賦一經減定賦額應卽酌定徵價力禁浮收從前之  
弊竇欲盡前除後此之攤捐必歸無著卽如官墊民欠已奏明禁  
革卽三次清查四次清查續辦清查案內墊欠之數長鉅迨三案  
定後照章查辦其本員已故子孫並無官職家產亦已盡絕者歸  
於無著項下由外籌補又道光二十五六七八等年墊完酒尾前  
經援案

奏請於道光三十年秋後起分作四年帶徵徵不足數著落原墊

及接徵之員分賠賠不足數立予參革未完銀兩亦歸無著籌補  
又道光二十一二等年夷務兵差不敷因公挪缺亦有由外攤補  
之款爲數均屬不資其籌補之法於通省州縣中按缺分之優瘠  
派銀數之多寡分年歸款名似有著而後任已爲前任所累且錢  
漕之羨餘雖取之於官仍係取之於民旣已派令攤補難保無恣  
意浮收之弊更恐正項錢糧藉端挪掩又其甚者有提無解徒託  
空言不特李代桃僵抑且盜鈴掩耳州縣之稍知自愛者負累無  
窮其不肖者藉端朘削民生口困職此之由茲際東南大定吏治  
更新所有從前攤捐積款應請

奏准一律豁免等情前來臣伏查三次清查酌提羨餘彌補蘇省  
雖已咨報提補足額尙有續查無著待補之款而四次清查續辦  
清查及墊完漕米兵差不敷案內待補者凡屬爲數繁纍且查咸

豐十年以前蘇省倘有在外攤捐之款或由州縣詳明有案或由府司遇事飭捐並有因公會議分年攤補各項雖未

奏咨有案而捐攤名目則同因之挪動庫款均須歸補計自江甯失守後蘇松五府州屬次第被擾倉庫焚掠一空物故人亡變亂已極前五案之攤款及由外之攤捐久經停攤茲幸大功告成全省肅清復奉

特恩減免浮糧浮稅既減羨餘亦因之並減

將前五案之攤補等項銀款仍責令現任人員按數分別起攤不特案據無存款目轉帳而物力已盡官累無窮殊非與民更始之義檢查四次清查案內如應追官欠之前任嘉定縣知縣楊遇恩等員已由原籍廣東遵照

恩詔條款咨請豁免此係本身應追之款既可照例請豁則蘇省各屬籌補前任虧缺無著之款情事更輕且查江西省道光二十

五等年豁免清查等案查出官墊民欠及攤補兵差經費並因公  
挪缺等款經督臣曾國藩於同治元年開奏奉

恩旨全行豁免江蘇事同一律惟有仰懇

天恩俯將前五案籌補攤補銀兩及咸豐十年以前一切由外捐  
攤各款援照江西成案

准予概行豁免其餘流攤各員永遠禁革消官累卽以紓民困從  
此根本既清末流可戢庶倉庫絲粒可歸實在州縣亦無所藉詞  
似亦澄清吏治慎重度支之道所有請免攤捐積款永禁流攤各  
緣由恭摺具陳伏乞

皇太后

皇上聖鑒訓示謹

奏

赫德請加按察司銜片

同治三年十一月初五日

再蘇浙用兵以來凡選人效順助剿有功均隨時

奏請分別給獎茲查總稅務司赫德年來經理洋稅接濟餉需用  
資戰勝卽興實力行間無異戈登籌帶常勝軍隨同攻剿每遇緊  
要機宜赫德無不贊助上年克復蘇州時戈登以卹逆等語誅頗  
有齟齬經總理衙門王大臣面屬該總稅司從中調停臣復推誠  
相待戈登幡然悔悟倍加出力該總稅司陰與維持深明大體實  
屬著有勞績查海關現定會訊章程遇有洋商應訊事件該總稅  
司亦與聞聽斷律以刑官之義並請以歷服各國幫訟之領事擬  
請

旨賞加赫德按察司銜以昭激勸除常勝軍出力各洋弁續行查  
核彙奏請獎外理合附片具陳伏乞

聖訓示誼  
奏

免追徐佩瑗前領餉銀片

同治三年十一月初五日

再上年十一月蘇州克復後據提督程學啟呈據營帶巡湖營水師徐佩瑗稟稱去歲冬月駱國忠在常熟獻城職兄練總道貝徐佩瑗先與合謀即親身前赴蘇城密約諸逆酋同時舉事詎忠逆自常州回蘇事洩被囚旋付募逆譚紹洸鎖押偽半手足俱受重刑求死不得十月官軍攻克許關募逆恐生內變將職兄提出禁所職兄見賊即罵募逆手放三洋鎗兄罵聲未絕即時斃命以前隨去之家丁陳春潛匿城中詳悉情形省城克復探赴職營述其事伏念職兄以內閣入城幽囚一載竟爾捐軀雖事鮮成效而血忱不泯由程學啟查明據情轉稟並懇奏請議卹等情本年四月復據徐佩瑗稟稱兄佩瑗於咸豐十一年五月間奉委辦蘇城勦撫前後領過募勇經費銀十二萬五千兩不期內應之事功隳重



成練局又於同治元年冬間被賊衝毀村莊廬舍焚掠一空佩瑤潰圍突出所帶軍火船械練勇人等家點驗立營歷次隨勦追溯兄佩瑗自咸豐十年集團募勇堵禦將及三載中間與賊接仗十數次糧餉軍火需費浩繁家資不給繼以籌捐籌捐不敷繼以請餉統計局帳開支糜米約三萬餘石銀款約二十餘萬查本省防勦募勇經費向准開支造銷職兄當時倡義守衛原無冀俸准銷之心惟家業盡毀於賊職兄又以內開死事前項領款無力清繳

懇

奏准免追等情前來臣查徐佩瑗辦團始末眾論微有異同然當蘇城初陷賊饑四張永昌鎮去城四十里已入虎口徐佩瑗傾資結眾且戰且守開用權宜驅磨之術爲久持自完計附近數十里內賴以苟安兩次設計內應卒死其事家亦旋毀心跡大明其弟

候選道徐佩璠收合餘燼管帶礮船隨同程學啟進剿崑山吳江  
蘇州府興各城戰績卓著而徐佩璠從前領款未及造銷懸案待  
結究之款歸公用不應取償於一家功雖無成未便勒賠於身後  
合無仰懇

天恩准將徐佩璠前領餉銀十二萬五千兩概免追繳飭由前署  
蘇藩司吳煦領入軍需案內遵照新章開報免其造銷至徐佩璠  
應否議卹之處容飭忠義局司道核明詳辦所有查明練董死事  
懇

恩免追領款緣由理合附片具陳伏乞

聖鑒訓示謹

奏

本科鄉試通融辦理摺

同治三年十一月二十九日

奏爲監臨鄉試出閣謹將本科通融辦理各事宜恭摺陳明仰祈  
聖鑒事竊臣入閣監臨仿照鄉省章程變通趕辦各情業經十月  
二十五日附片具陳在案臣於十一月初六日迎同正副考官  
劉峴平步青入閣計上下江應試者仍有萬餘人場內外均恪遵  
規矩現屆三場完竣硃卷封送內廉已畢照例將閣中事務飭交  
提調監試道員承辦臣卽於二十九日先行出閣惟查此次江南  
鄉試事同草創督臣曾國藩先期督飭司道布置周備而蘇皖士  
子流離遷徙之餘資斧維艱風波多阻未能剋期豫集又臨場連  
遇雨雪寒苦困頓迴異義時有不得格外體恤者卽如試卷一  
項向例並用江甯藩司印信乃初四日以後投卷尙多司印並用  
不及因令兼用江安糧道印俾可無誤試期又向來上下江學政

錄遺截止後不再收考此次學臣雖極寬限其遲到諸生仍有不及錄遺者即准由臣處給照辦卷入場場後仍各送學臣補充臣復於受卷之日督同提調監試各員查閱應貼各卷照例議貼其添注塗改等項錯誤及無礙文理無關弊實者酌從寬免夫

國家掄才大典臣敢不恪慎將事惟金陵停科十二年多士荒疏

已久一旦振興文教遠近鼓舞臣仰體

朝廷寬大之意未便拘執成例尤願明年試卷解部部臣磨勘稍寬其例以相紓也所有江南本科鄉試通融辦理事宜專摺具陳

伏乞

皇太后

皇上聖鑒訓示施行謹

奏

劉銘傳等軍暫難赴豫遠征摺

同治三年十二月十九日

奏爲欽奉

寄諭體察軍情據實覆陳仰祈

聖鑒事竊臣承准議政王軍機大臣字寄十二月初九日奉

上諭賊由南召北趨魯山窺伺河汝價格林沁張之萬先後督軍

馳紮葉縣曾國藩前派分赴楚豫之劉連捷劉銘傳等軍曾否到

防著曾國藩李鴻章迅檄劉連捷等所部星速馳赴豫境毋許再

有稽延等因欽此臣查劉銘傳周盛波各營在蘇境轉戰數年所

用均係外洋軍火劉銘傳營內並有練成開花礮隊一營其洋礮

二十餘尊大者四五千斤小亦千餘斤數百斤不等車架器具均

仿照洋式笨重異常礮彈火藥動需數萬蘇省水鄉頗有船隻運

駛故赴機應敵不致遲誤一經派往陸路攜帶運萬分掣肘勢

難如期應調臣前在金陵曾國藩商調該軍赴皖當以南循大江  
北沿淮河駐紮防勦軍火礮彈由蘇轉解雖遠而尙能運到雖遲  
而可期決勝若調往西北水道不通接濟不及誠恐遷地弗良是  
以曾國藩奏明劉銘傳等軍宜以三河尖固始爲老營凡皖豫交  
界有警相機勦辦蓋欲就淮河爲轉運之路蘇省當設法籌濟也  
臣於十二月初六日自金陵起程回蘇其時曾國藩先奉

寄諭飭調劉銘傳等營赴豫與臣再四籌商苦無善策臣於初十  
日抵蘇十一日接據劉銘傳由六安來稟以該軍與周盛波各營  
自廣德漂陽移營渡江沿途雨雪阻滯長行將近一月始抵六安  
兵勇不勝疲憊因內河水涸舟膠倉猝遣行所有洋鎗炸礮配用  
藥彈不能多運尙遺礮隊及洋軍火數萬屯留建平須俟來春水  
長始可設法陸續運營未便卽赴豫省陸路遠征以致誤事各等

情臣查劉銘傳周盛波皆係蘇軍驍將向來奉調卽行毫無避忌  
臣等既檄令出境斷不敢稍分畛域惟該軍事恃鎗礮軍火制敵  
角勝目前既未運齊似難遠調南召魯山在豫省西北由六安三  
河尖西去千餘里均係旱路不通水道糧餉軍火由蘇解濟又遠  
隔數千里萬萬不及必致中途飢匱且賊蹤飄忽節節落後亦恐  
於大局無裨臣統帶該軍較久深悉實在軍情不敢不詳細上陳  
可否俟明春水長察酌入豫道路何處可通舟楫易於轉運再行  
相機調度俾臻穩慎仰懇

聖明俯准照辦曷任感戴所有劉銘傳等營暫難赴豫遠征各情  
理合恭摺由驛據實覆陳伏乞

皇太后

皇上聖鑒訓示謹

奏



軍需核實報銷摺

同治三年十二月二十七日

奏爲遵

旨酌擬蘇滬軍需收支各款核實開報章程恭摺奏祈

聖鑒事竊准部咨同治三年八月二十日奉

上諭同治三年六月以前各處軍務未經報銷之案准將收支總數開單存案免其造冊報銷事屬創始其中款目繁多應如何分年分起核實開報之處著該大臣督撫等各就實在情形先行妥議章程具奏等因欽此仰見

聖恩寬大豁除常例推誠開外凡有血氣莫不欽感伏查軍需用款絲毫皆

國帑民脂豈容稍有浮濫惟用兵之道因時因地當隨事勢以爲權宜緩急所需實用實銷必與例案不能盡合臣前因蘇滬軍營

收支繁冗應分限截數報部核銷當蘇州藩司劉仰曾暨運使銜候補道章埏設局認真查辦在案今同治三年六月以前未銷各款既蒙

恩免其報銷於成法無所拘閔則開報更不容遷就復飭該司道等督飭局員按款勾稽悉心釐剔其有事所必需與例未符之款卽行據實開報不得飾混以期仰副

朝廷實事求是至意茲據酌擬開報款目章程十條會詳前來臣覆加確核均係實在情形合將章程繕具清單恭呈

御覽謹會同協辦大學士兩江總督臣曾國藩專摺具陳伏乞

皇太后

皇上聖鑒訓示謹

奏

京營官弁習製西洋火器漸有成效摺

同治三年十二月二十七日

奏爲京營官弁習製西洋火器漸有成效仰懇

天恩先行獎勵恭摺奏祈

聖鑒事竊臣前奉

寄諭總理各國事務衙門奏請派京營弁兵學製火器等語業經諭令火器營照所請派撥矣此起弁兵俟抵江蘇後卽交李鴻章差委專令學習炸礮炸彈及各種軍火機器如能留心學習著有成效者准該撫從優奏請獎勵等因欽此仰見

聖謨廣運默寓機宜莫名欽服旋據儘先參領薩勒哈春等官兵四十八員名來蘇稟到當經分派製造洋礮各局督同該管各員盡心教習將炸礮炸彈各種機巧火器製造運用諸法逐細指授成立課程臣復隨時稽核勤惰半載以來該官弁等勤苦講求協

同中外工匠依式仿造頗得門徑雖開爐鑄礮試演準頭尙未遽臻精熟而由此用心不懈一年半後當能自出機杼爲他處設局製器之先導臣查西洋諸國以火器爲長技欲求制馭之方必須盡其所長方足奪其所恃臣設局仿製原爲軍需緊急起見亦欲中國官弁匠役互相傳習久而愈精但苦機器未能購全巧匠不可多得造成礮彈雖與外洋規模相等其一切變化新奇之法竊愧未遑該參領等遂曰究心於炸彈一項已得要領尙屬奮勉可嘉理合繕具清單仰懇

天恩先行獎敘俾已能者交相鼓舞未能者益加策勵俟習學有成再邀

旨破格請獎臣仍督飭局員勸加訓練多方研究以期精益求精仰副我

國家蒐討軍實之至意所有派習火器官弁漸有成效懇  
恩獎勵緣由專摺具陳伏乞

皇太后

皇上聖鑒訓示謹

奏

李文忠公奏稿卷七